

AKHINNAJA AY ALIGKHUJON.

1 Anu hi Aligkhujon.

2 Gwacha han ohan arkhaw ja nenomnom na an podhona an marhin.

3 Hotti enala na chin pfangaw na ja chin hongot na ja empacheh na.

4 Narpu hichi pfutajan amarkhaw ja enedchong na an umuy hichi alimhan amarkhaw. 5 Ja hini nenomnom na ja hini mahhun an chakngana an pfallahang ja hija chi ahagwaona.

6 Unagkhu gwa hichi tongan chi acha ja gwacha han chengngor na an khun muntalanu an agwitan.

7 Ja allonah, <<Umuja' adchiya ay chuy. Nu khuh ni' han pfalay.>>

8 Ja empacheh na an umuy ja chinakngana hichi pfalay ja tinnig na han pfupfay an marjaw chi nunchimmang ja khun mun-apfor.

9 Ja empatang Aligkhujon chin pfangaw na ja inali na chi, <<Uminuma' akkay hay chanum ju.>>

10 Ja inalin chin pfupfay an hi Akhinnajah, <<Ti aa kayku.>>

11 Emponag na chin khuna ablun ja henongkhop hichi pfalay ja enala na chin ongot ja enehgwo' na chin pon-otanan.

12 Engkhahad na ja inali na hi, <<Tayya, hitay chanum ta uminum a. Ngay ngachan mu?>>

13 Inali na hi, <<Ha-in hi Aligkhujon an narpu hichi pfutajan amarkhaw.>>

14 Ja imminum hi Aligkhujon ja inumpfun ja inali na hi, <<Tan una' immali an i maningit hi ija' ahagwaon, ja tan he-a ton nahhun an chinaknga'.

Hotti podhom chah ta mun-ahagwa ta?>>

15 Ja inalin Akhinnaja hi <<Ti aa kayku, muti khenong ta umali cha ama ay ina ta munhahapit ta-o nu podhon cha an mun-ahagwa ta.>>

16 Unot nahilip ja immali chin ammod Akhinnaja ja ni'hapit hi Aligkhujon.

17 Ja inali na hi, <<Tan una' immali ta ahagwao' hitay empalay ju.>>

18 Ja inalin chin ammod Akhinnaja hi <<Ti aa un mu podhon.>>

19 Ja allona hi, <<Podho', hotti mun-ahagwa ami ja epacheh mi hi magwiit ta ijuy uh pfalay mi ti gwa an khun cha munhakhana hana tatakhu ta en-anamot u ayya hini hingito' an ahagwao', ja namalinpin ami ken.>>

20 Ja inalin chin ammod Akhinnaja hi, <<Ijuy mu, muti khenong ta magwi'gwiit ja un aju umuy.>>

21 Ja inalin Aligkhujon hi <<Ti aa.>>

22 Nun-ingwi-gwiit ja nangan cha chin nannanong.

23 Ja khapo ta pfallahang ken hi Akhinnaja ja achi podhon Aligkhujon an chumalan ti maghitan.

24 Hotti una enpfangaw hija.

25 Nunlopfong hi Akhinnaja hi maphod ja nun-uynu chin pfangaw, ja enpfangaw Aligkhujon.

26 Ja inalin aman Akhinnajah, <<Tayya, epfarno' u hitay pfunguhan ay tay partug ta, nu mungkeeng ayya hitay pfunguhan, ja ma-annila an un mu inhakhigwalat hitay empalay u.>>

27 Ja inalin Aligkhujon hi, <<Aa.>>

28 Amat hichi, ja empacheh cha an umuy.

29 Empacheh cha Aligkhujon ay Akhinnaja ja inlahiyan cha han ohan pfuglay.

30 Ja na-ugwaw hi Aligkhujon ja gwa han chinakngana an ohan pfupfai an timmungaw ja inalin Aligkhujon hi, <<Mi-inum ta akkay hay enerpoh ju.>>

31 Ja allon chuy pfupfay hi, <<Gwacha, muti napoh, hotti umuy a hichi ah-ahpfuna ta alam ja gway enerpoh hachi uchumna.>>

32 Ja inali na hi, <<Umuy ami.>>

33 Ja inalin chin timmungaw hi <<Aa.>>

34 Empacheh cha ja immuy cha khu ay chuy oha an pfuglay.

35 Ja chinakngan cha han ohan pfupfay an khun mun-apfor ja khun munmoteer hichi mata na.

36 Ja inalin Aligkhujon chi, <<Mi-inum ta akkay hay enerpoh ju.>>
37 Ja allona hi, <<Aa, nu han enerpoh u an munlameh ti inchumallingan hini enerpoh u.>>
38 Ja inpfuwat na hi Akhinnaja ken an pfinangaw na.
39 Ja henongkhop gwot hi Emmamata'-on, ja i na impau' chin enerpoh na an pfupfud.
40 Ja inali na hi, <<Aligkhujon, mu hongkhop a mah ta uminum a.>>
41 Henongkhop hi Aligkhujon ja khun umin-inum hichin enerpoh Emmamata'-on.
42 Ja unot tinnig Emmamata'-on an napfutpfutong hi Aligkhujon, ja khuna allon hi, <<Tayya pay. Uminum a, ti tan cho-or.>>
43 Khuna pa-ipa-inumon hi Aligkhujon, ja ingkhana an napfutong.
44 Ja khimmahad hi Emmamata'-on ja impfughor na chin pfangaw Aligkhujon, ja tinnig na hi Akhinnaja hichi choharna.
45 Ja impapfutay na hi Akhinnaja ja nunho-or na.
46 Inaana chin lopfong na an napupukhit ja inaana chin lopfong Akhinnaja an mapmaphod.
47 Ja enlopfong Emmamata'-on chin lopfong Akhinnaja, ja impilopfong na khuh chin lopfong na ay Akhinnaja.
48 Ja nun-uynu hi Emmamata'-on chin pfangaw Aligkhujon.
49 Ja amat hichi, ja unagkhu najahjah hichin pfinutong Aligkhujon, ja khimmahad, ja inali na hi, <<Anad ay chita an chan naha'-ad?>>
50 Ja inali na hi, <<Ekharkhalagkhar u an umuy ta achi ami madhoman ay tay chalan.>>
51 Empfangaw na hichin pfangaw, ja inali na hi, <<Anagkha hitay pfangaw ta machamot?>>
52 Ja inalin Emmamata'-on an gwa hichi choharna hi <<Khangayna ti nan un mu intata'chug hijaot un chimmamot hitay hena'pfatam, hotti i ta gwot.>>
53 Ja empacheh cha ja empfangaw na ken hichin machamot an pfangaw ja empacheh na an umuy.
54 Ja mungkeengot hichin pfunguhan an empfarno' chin ammod Akhinnaja chin partug.
55 Ja inalin chin ammod Akhinnaja hi, <<Angkhaynana an inhakhigwalat Aligkhujon hi Akhinnaja!>>
56 Ja inali na ay chin agwitan hi, <<Umuy a ta im hingiton hi Akhinnaja ti tan inhakhigwalat Aligkhujon ti tan omod an mungkeeng hitay empfarno' u an pfunguhan.>>
57 Amat hichi, ja impipfoong na chin lanob ay chuy agwitan.
58 Inali na hi, <<Hijah tay chi ijuy mu, ja empelanob mu ay Akhinnaja hot matakhu.>>
59 Ja amat hichi, ja immuy chin agwitan, ja tenomnong.
60 Ja immuy ay chuy pfuglay an negpongan chin pfalay Emmamata'-on.
61 Ja tinnig na hi Akhinnaja an nehaha'mang chin hapang chi ajiw an entapar ken Emmamata'-on.
62 Ja nun-opah chin agwitan ja enala na hi Akhinnaja ja lenonob na.
63 Pinitlo na an lenonob hi Akhinnaja ja unagkhu la-ahna ja khun mumpfangngad chin hochohchan Akhinnaja.
64 Ja empelanob na khuh chin agkhuy an lanob, ja pfimmangon hi Akhinnaja.
65 Ja empelanob na pay chin uchumna an lanob, ja chimmalan mahpay hi Akhinnaja.
66 Ja amat hichi, ja inalin chin agwitan hi, <<Mumpfangngad ta hichi pfalay cha amam ti tan i chi-a inhakhigwalat ay Aligkhujon.>>
67 Allona hi, <<Achi an mangunucha' ta ija' alaon hini hengheng u ja chin lopfong u ja una' mumpfangngad.>>
68 Ja amat hichi ja tenomnong khu chin agwitan.

69 Ja numpfangngad hi pfallay cha chin ammod Akhinnaja ta i na ken ipa-innila an nummahu hi Akhinnaja.

70 Ja amat hichi ja hi Akhinnaja ja empacheh na an mangunud ay chuy ene-engwan Aligkhujon an ene-edchong na ay nuy pfutajan amarkhaw.

71 Unot pfimmutay ay chuy oha an pfuludna, ja enamang na hi Aligkhujon an khun mangti-id ay chin machamot an enhape-eng na an hi Emmamata'-on.

72 Ja inumpfun hi Akhinnaja ay chuy panpantoto' chuy pfuludna, ja inali na hi, <<Hachona', hadhadchona' Aligkhujon, ti hi mangkay Emmamata'-on hinuy empfangaw mu an pfu-un hi Akhinnaja!>>

73 Nungwingi hi Aligkhujon ja inali na hi, <<Nga chah chuy ahighikha an khun mangunud?>>

74 Ja inalin Emmamata'-on an gwa ay chi pfangaw hi, <<I ta gwot, ti tan hukhit an khangayna hichuy khun mun-u-uwai'. I ta ti tan hukhit!>>

75 Amat hichi, ja empacheh cha khu.

76 Ja nalahin cha khu ay chuy oha an pfuludna.

77 Ja ne'hagwang khuh Akhinnaja ay chuy pfuludna an inlahiyan cha.

78 Allon Akhinnaja hi, <<An akhamoh kayku hi Aligkhujon an anong un ta khun mun-umun-ugwap an allon hi hachona' adni' ja achiya' hachon!>>

79 Ja amat hichi, ja inumpfun khu hi Akhinnaja ay chuy pfuludna, ja en-amang na khu an mun-uwai'.

80 Inali na khu hi, <<Hachona', hadhadchona' Aligkhujon. Ti pfu-un mangkay hi Akhinnaja hinuy empfangngaw mu an hi Emmamata'-on!>>

81 Inalin Aligkhujon hi, <<Ngachan mu mah ton gwa ay tay pfangaw? Unchah pfu-un he-a hi Akhinnaja?>>

82 Ja allon Emmamata'-on hi, <<Ha-in hi Akhinnaja. I taot ti tan hukhit.>>

83 Ja allon Aligkhujon hi, <<Hot tikha' adchiya tugwali ta eto'gwab u ta tikha' nu he-a hi Akhinnaja.>>

84 Ja enomchon gwot hi Emmamata'-on chin tangob chin pfangaw.

85 Ja unagkhu ipfughor Aligkhujon, ja achi mipfughor ti khun ken mumpfitin ay chuy tangob.

86 Ja inalinot Emmamata'-on hi, <<I taot numpay, ti tan maghitana'.>>

87 Ja amat hichi, ja inalin Aligkhujon hi, <<Ti aa ken, i ta.>>

88 Ja empfangaw na khu ja khun umuy.

89 Ja gwa mahpay an mehnot chah chin pfallay Aligkhujon ja enamang Aligkhujon hichi pfallay cha an cho-or chin takhu an hohodchon cha ken chin i-anamot na an ahagwaona.

90 Ja empacheh cha an khun umu-umuy.

91 Ja unot gwa an nalahin cha ay chuy oha an pfuludna, ja enamang khu Akhinnaja ja allona hi, <<Ay inay hi Aligkhujon an la-ahna ja achiya' tatagwa ihi-ar an anong un allon hi hachona' ja achi cha homod.>>

92 Ja empacheh na khu an mangunud ja khun mun-igwiggwilit an khun mangu-uwai'.

93 Ja allona hi, <<Hachona', hadhadchona' Aligkhujon, ti hi mangkay Emmamata'-on hini empfangngaw mu an pfu-un hi Akhinnaja!>>

94 Chengngor Aligkhujon ja allona ay chuy pfangaw hi, <<Unchah he-a hi Emmamata'-on?>>

95 Ja allon Emmamata'-on hi, <<Pfu-un an ha-in hi Akhinnaja, hotti i ta ti tayya an hukhit.>>

96 Ja inalin Aligkhujon hi, <<Aa, me-atam ta.>>

97 Ja empacheh cha ja khun umu-umuy hi Aligkhujon ja ne-atam cha hichi pfallay cha.

98 Ja inpfuwat na chin pfangaw ti gwa ken an munlallengot hija, ti nablay an nangpfangngaw ay Emmamata'-on.

99 Ja allon hachi tatakhu hi, <<Ot ipfughor mu hadchiya ken hini pfangaw ta tikhan ta-o hini im pfinangaw an ahagwaom ti tayya ken an cho-or ami, ta mamalinpin ta-o.>>

100 Ja unagkhu ipfughor na chin pfangaw ja achi mipfughor ti khun munpfimunpfitin hi Emmamata'-on.

101 Ja gwacha gwot an pfimmutay chin pfuludna khu hi Akhinnaja an ahighikha chin lopfong na an nakaykajot ti ken chin lopfong Emmamata'-on chin enlolopfong na.

102 Ja enamang Aligkhujon, ja allona hi, <<Nga chah chuy ay chita an khun mangunud?>>

103 Ja immatunana an hi Akhinnaja ti anong ken un napupukhit chin lopfong na ja marjaw chi nunchimmang hi Akhinnaja an khun umali.

104 Ja allona hi, <<Anad ay chita an chuyya hi Akhinnaja. Un hijaot atag angnge un khun mun-amun-ali an hacho'. Ja nga chah tay ija' pfinangaw?>>

105 Ja amat hichi ja inali na hachi uchumna an linala-e hi, <<Umali aju adchiya ta ipfughor ta-o hitay pfangaw. Anah khuh un la-ahna ja achi mipfughor.>>

106 Ja nunlapchu' cha ken chin tangob chin pfangaw.

107 Ja unagkhu nipfughor ja gwa an khun munmoteer chin matan Emmamata'-on.

108 Ja inalin Aligkhujon hi, <<At anad ay chita Emmamata'-on, ta un he-a hitay ija' chinamtan an kemho' agkhu un he-a hi Akhinnaja.>>

109 Inu-at cha hi Emmamata'-on ja enala cha ja i cha en-alad chin khun agwon chin tatakhu.

110 Chin ken hu-i na chi khun cha pangcha-angan.

111 Ja immanamotot hi Akhinnaja ja gwa an khun munlulluluwa an komi'-ilah an allona chi, <<Chaadma chin lopfong u, inna Aligkhujon, ta mumpfangngacha'? Anad una' ay inhakhigwalat ay he-a ton chalan?>>

112 Ja allon Aligkhujon hi, <<Agkhuy u atag anila, ti tan hi Emmamata'-on ton nun-ephod hi amat heto.>>

113 Hotti enala cha ken chin lopfong Akhinnaja ay Emmamata'-on, ja impilopfong cha khu ay Akhinnaja.

114 Ja amat hichi ken.

115 Ja khapu ta cho-or chin takhu an hohohodchon cha hi Aligkhujon ja nun-ingwi'gwiit ay chi ne-ataman cha ja namalinpin cha ken.

116 Inalin Aligkhujon hi, <<Ti ituloy ta ken an mun-ahagwa, ti unchah ha-in chi nanghakhigwalat ay he-a an un hi Emmamata'-on. Hotti chuyya an enephod ta-o hi alad hi Emmamata'-on. Hijah chuy chi pfalloh tay i na enat an nunpfalin hi alad, ta poncha'-angan ta-o hichuy hu-ina ti anagkha tugwali ta i chi-a nunho-or ja tan emmat heto hitay pfaat u.>>

117 Amat ken hichi, ja cho-or chin takhu.

118 Hotti hi ayya Akhinnaja ja gwacha hichin pfinagkhang an pfinaluna an inirpu na hichi pfalay ama na.

119 Ja inali na hi, <<Hotti hay aton ta-o, ja ittugwan ju hay hachi aparjuparju' hi chanum.>>

120 Ja in-uy na chin hennohha an pfinagkhang ay chuy parju'.

121 Unagkhu la-ahna ja oh-ohha chin pfokah an nun-itto na ja napnu hichin aparjuparju' hi ma-an.

122 Amat hichi khu, ja enala na khuh chin i'-i'-itang an nakhodkhod an pfapfuy.

123 Ja inali na khu hi, <<Chamman ju khu hay hato uchumna an aparjuparju' ta ehaka'-ang ta-o hini ihcha ta-o.>>

124 Initto na khuh chin i'-i'-itang an nun-akhodkhod.

125 Ja unagkhu limmugwag chin chanum ja la-ahna ja napnu khuh chin parju'
hi nun-akhodkhod hi pfapfuy.

126 Amat hichi ja nun-aloto chin enhaka'-ang cha.

127 Ja khun ken allon hay hachi tatakhu hi, <<Anad ay chita hitay ahagwan
Aligkhujon an marjaw chi nunchimmang, ja cho-or khu hiton at-atona ti
chiyya an un oh-ohha chi pfokhah an initto na, ja napnu hichuy parju'.
Ja oh-ohhah chi nakhodkhod an initto na ay chuy parju', ja napnu khu hi
achotachotag.>>

128 Amat ken hichi ja henacha cha chin pfapfuy ja tenorgwa' cha chin
ma-an, ja nangan hachi tatakhu.

129 Ja achi mapmapoh chin chotag.

130 Amat ken hichi ja nun-ugnan hachi tatakhu chin cho-or an chotag cha
ja nun-i-anamot cha hichi nunhitogwan cha chin enala cha hichi pfalay cha
Aligkhujon ay Akhinnaja.

131 Unagkhu nun-akak chin takhu an gwacha cha hichi chalan cha ja
immuchan.

132 Ja numpfalin chin chotag hi a-inlu-inlum.

133 Hijah tay chi ang-angonohna ken, ja angkhay.